

Illunut sanaqataaffiusunut taarsigassarsiat pillugit Inatsisartut inatsisaata allanngortinneqarnera pillugu Inatsisartut inatsisaat (Illunut sanaqataaffiusunut kommunimit taarsigassarsiat, illunillu sanaqataaffiusunik il.il. aserfallatsaaliuinissamut, nutarterinissamullu taarsigassarsiat tapiissutillu)

Ineqarnermut Attaveqaasersuutinullu Naalakkersuisoq

pillugu

Sanaartornermut Ataatsimiititaliap

Siunnersuutip aappassaaneerneqarneranut

ISUMALIUTISSISSLUTAA

Sanaartornermut Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Kristian Jeremiassen, Inuit Ataqatigiit, Siulittaasoq
Inatsisartunut ilaasortaq Siverth K. Heilmann, Atassut, siulittaasup tullia
Inatsisartunut ilaasortaq Mikivsuk Thomassen, Harald Biancomut sinniisutut, Inuit Ataqatigiit
Inatsisartunut ilaasortaq Dines Mikaelsen, Jens Kristian Therkelsenimut sinniisutut, Siumut
Inatsisartunut ilaasortaq Lars Poulsen, Siumut

UKA 2023-imi ulloq 10. november siullermeerinninnerup kingorna ataatsimiititaliap siunner-suut misissorpaa.

Siunnersuutip imarisaa siunertaalu

Illunut sanaqataaffiusussanut taarsigassarsiniartarnerup qulakkeerneqarnissaa ajornannginnerulerlernissaalu taarsigassarsiniartarnerullu innuttaasunit soqtigineqarnerulerlernissa siunnersuummit siunertarineqarpoq.

Innuttaasut tamarmik inoqutigiit isertitaat apeqqutaatinnagit illunik sanaqataaffiusussanut taarsigassarsinissamut qinnuteqarsinnaanermik siunnersuummi periarfissinneqassapput.

Sanaartorfigissaanermut aningaasartuutit aamma innaallagissap erngullu aqqutaannut, kuuffiliinernullu attavilernissamut aningaasartuutissat 100 %-ii angullugit illumik sanaqataaffiusussamik pisinissamut taarsigassarsisoqarsinnaaneranik aaqqissuussineq siunnersuuteqarnikkut eqquunniarneqarpoq.

Taarsigassarsisup nammineerluni 25.000 kr.-nik akiliuteqassasoq siunnersummi atuuttussangortinnejarpooq. Nammineq akiliutissat aalajangersimapput, qinnuteqartullu inoqutigiittut isertitaannut naleqqussarneqassanatik. Taarsigassarsisinnaasup aningaasartuutai 100 % tikillugu taarsigassarsissoq taarsigassarsisinnaavoq, tk. Siuliani allassimasut, taamaalilluni taarsigassarsiat inoqutigiit isertitaat tunngavigalugit appartinnejassanngillat.

Illunut sanaqataaffiusussanut taarsigassarsinissamut periarfissat ammaanneqartut il. II. erniat aalajangersimasut erniaat + 3 % pointimik ilallugit ernialersorneqarnissaat siunnersummi atuutilersinneqassaaq. Ukiuni 20-ni taarsersuisoqarnissaani erniat aalajangersimasuupput. Inoqutigiit isertitaat 300.000 kr.-nit sinnersimappatigit, inoqutigiit isertitaasa 35%-ii taarsersugassarsisup naatsorsuinermi nammineq akiligassarissavai. Akiligassat akilerneqanngitsut sinneruttut nalikkaliliissutigineqartassapput. Taamaallutik inoqutigiit 300.000 kr.-nit ataallugit isertitallit akiliuteqartinnejartassanngillat. Taamaattoqartillugu taarsigassarsiat tamakkiisut nalikillilerneqartassapput.

Siunnersuutigineqartoq naapertorlugu taarsigassarsianut akiliutigineqartut aalajangersimasunut atugassanut agguagassanut nuunnejartassapput. Aningaasat agguagassat communalbestyrelsip illunut sanaqataaffiusunut piovereersunut pilersaarutaasumik aserfallatsaalineqarnissaannut, nutarterneqarnissaannullu taarsiissutitut imaluunniit tapiissutitullu atorneqartassapput.

Siunnersuutip Inatsisartunit siullermeerneqarnera

Siunnersuutip Inatsisartuni siullermeerneqarnerani ataatsimut isigalugu taperserneqarpoq. Illoqarfinni mikinerusuni nunaqarfennilu sanaartornerup siuarsarneqarluni kikkullu tamarmik namminneq inissaminnik sanaartornissamut periarfissaqarnissaat pingaaruteqartoq qulakkeerneqartariaqartorlu isumaqatigiissutigineqarpoq. Siunnersuutip suliarineqarnera pitsaanerpaaffissamiinnissaa qulakkeerneqartariaqartoq isumaqatigiissutigineqarpoq, taamaalilluni Inatsisartut inatsisaat suliarilluagaalluni atuuffissaminut naapertuuttuunissaa isumaqatigiissutigineqarluni. Siunnersuutip ataatsimiititaliamit susassaqartumit suliarineqarnissaa partiinit tamanit kissaatigineqarpoq.

Tusarniaarnermit akissutit

Tusarniaarnermit akissutit inatsimmut siunnersummut ilangunneqarput, tamanna Inatsisartut Siulittaasoqarfiata ilusiliinissamut piumasaqaataanut naapertuuppoq.

Piffissami 10- 31. oktober 2023-mut tusarniaanermut piffissaritinneqarpoq. Tusarniaanermut piffissaritinneqartoq nalinginnaasumik sivikinnerpaamik sapaatip akunnerinik sisamanik sivisussuseqartartussaasoq ataatsimiititaliamit maluginiarneqarpoq, taamaammattusarniaanermut piffissaritinneqartup sivikkippallaarnera ataatsimiititaliamit isorineqarpoq.

Ataatsimiititaliap siunnersuummik suliarinninnera

Illunut sanaqataaffiusussanut taarsigassarsiniarsinnaanermut periarfissat atorneqarneq ajornerinut misilittagarineqartut tamatumunngalu pissutaasut tusaatisatut tiguneqartut siunnersuut manna aqqutigalugu pitsangorsarniarneqarnerat ataatsimiititaliamit pitsaasutut isigineqarpoq. Taarsigassarsisup nammineq akileeqataaffigisassai malunnaatilimmik annikillisinneqarsimammata, taarsigassarsiffiusinnaallutik aningaasartuutissat 100 %-imik aningaasalersorneqarnissaannut taarsigassarsisinhaallutik, taarsigassanillu sanaartorfigissaanermut atassusiinissamullu aningaasartuutinut matussusiinissaat ataatsimiititaliamit immikkut maluginiarneqarpoq. Suliniut taamaattut innuttaasut amerlanerit illunik sanaqataaffiusunik pissarsisinnaanissaannik qulakkeerinninnerusoq ataatsimiititaliaq naliliivoq.

Siunnersuutip aningaasatigut kingunerisassai

Siunnersuutip piviusunngortinnerani aningaasatigut kingunerisassai siunnersuutip nalinginnaasumik oqaaseqaataani allaaserineqarput. Illut sanaqataaffiusussap pissarsiarineranut taarsigassarsisup akiligassaanut taarsersugassarsisullu qaammammut akiligassaanik naatsorsueriaasissaq suliarineqassasoq tassani allaqqavoq. Aningaasanut inatsimmi taarsigassarseriaatsip ineriartortinneqarnissaa aningaasanut inatsisimmi ilaani allami kinguneqassasoq ataatsimiititaliamit maluginiarneqarpoq, tassami aningaasat allaminngaanniit nuunneqarnissaat pissusissamisoormat.

Siunnersuuteqartup periarfissat taamaattut misissorsimassagai Naalakkersuisullu peqatigalugit aningaasanik pingaarnersiuinermik pisariaqartitsisoqarnera qulaajarsimassagaa ataatsimiititaliamit qularineqanngilaq.

Kommunit allaffissornikkut suliassaasa annertusinissaat naatsorsuutigisariaqarnera siunnersuutip nalinginnaasumik oqaaseqaateqataani ilanngullugu allassimavoq. Kommunit illunut sanaqataaffiusunut taarsigassarsisup ernianut akiligassai nassiuttartussaagaat, taarsersukkanullu akiliutigineqartartunit illunut sanaqataaffiusunik pilersaarutaasumik aserfallatsaaliinissamut, nutarterinissamullu atorneqartussanik agguassinerterik aqutsisussaasoq oqaatigineqassaaq.

Kommunalbestyrelsit illut sanaqataaffiusussat amerlassusissaasa aalaakaanissaannut aningaasanik amerlanerusunik immikkoortitsisoqarnissaanik pisariaqartitsisoqarsinnaanera siunnersuummut nalinginnaasumik oqaaseqaatini allassimasoq aammattaaq allassimavoq. Kommunit allaffissornerulerunertik pissutigalugu Namminersorlutik Oqartussanit

ataatsimoortunik tapiissutinik annertunerusumik piumasaqartoqarnissaanik malitseqarnissaa naatsorsuutigisariaqartoq ilanngullugu oqaatigineqarpoq. Taamaattumik ataatsimoortumik tapiissutinik qaffaasoqarnissaanik piumasaqaateqartoqarsinnaanera ataatsimiititaliamit maluginiarneqarpoq. Aningaasanut inatsimmi pingaarnersiuinermi malitsigisinnasaat kingunerisinnasaalu ilanngullugit Naalakkersuisunit isummerfigineqarnissaat ataatsimiititaliamit naatsorsuutigineqarpoq.

Ataatsimiititaliap inassutai

- Ataatsimiititaliap tamarmiusup siunnersuutip akuersissutigineqarnissaa inassutigaa

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiitaliap siunnersuut aappassaaniigassanngortippaa.

Kristian Jeremiassen
Siulittaasoq

Siverth K. Heilmann
Siulittaasup tullia

Mikivsuk Thomassen

Dines Mikaelsen

Lars Poulsen